

Nge'el jamanel

Mido yetta Jooman Gooto Wawdo mo ronkataa, 1
yo O jul e on mo O okki dokke de huuɓataa.

Jiyangel gorel hino halde haala ka wortataa, 2
seerenɓe Fuuta no tilfori non dun tultataa.

Mo selii datal rewi ladde majjay hewtataa; 3
Si o jokku gootal haa o hewta o tampataa.

Ko nde Fuuta selunoo lontagol fii laamagol, 4
ngun laamu jeydo ngu on ko Alla O okkataa!

Faalaado dun gaanin Siraate o gaynataa! 5
Si o lumbu, o okkaama laamu, lando O follataa.

O wi'ii malaa'ika en O lontan yimɓe ben, 6
yo be siinu gaa ñaawooje makko O tooñataa.

Nulanoobe fow ko O nuldi ben le ko lontagol, 7
haa hewti Burdo tageefo, be'e fow tooñataa.

Ko tayo-endamaaji e jeeno firtori leydi ndii, 8
wano feccondirɓe e hoore mayri be feewataa.

Suno jawle hewde e rewɓe firtori leydi ndii, 9
woni guuwe guuwe e hoore mayri be yiidataa.

Galleeli moyyi e pucci songani, yimɓe ben 10
woni feccondirɓe e hoore mayri be yiidataa.

Hay neene-gooto si nangu gootun fottataa. 11
Den berde maɓɓe ko huccondirɓe, de fewtataa.

Warugol gedal muudun ko mawdun kuude fow! 12
Yurmeende yawtii berde julɓe, nde artataa

Konu maccunguure e horbe bewnay jeybe dun, 13
hibe lorra julbe e joododaabe, be wewlataa.

Seytaane moobii din koneeli e hoore maa, 14
ngon hoggo makko o yidinii ngo, a yaltataa

Si beleedi fewjii, dirge jillii, feewataa 15
Ibliisu tawtii nafsu ! aybe be lannataa.

Ko nde lambe pottinnoo gedalbe waliyyu en, 16
wowloobe weldi badii, be wowli ko feewataa.

Naawoobe naawiri ngeenaloy koy duncataa; 17
Fewjoobe fewji no hewra jawle de lannataa.

Ben lambe ruggii jawle, ballaje fow tay'aa, 18
jattaabe wulli e lambe, huunde be hettataa.

Sagataabe wonti e wujjugol maa jattugol; 19
jon jawle en tefa feeña; huunde be darnataa.

Huwwoobe wonti e tultugol maa suudagol; 20
Gootel ka hammiri hella diina be meemataa.

Suddiibe wonti e fii cufaari e fowtagol; 21
Mo no dabba fowtere gaa, no dabba ko meemataa !

Mijooji mabbe ko kurkaduube e beydi buy, 22
tawa cuudi moyyi e dande mbalndi ndi kaanataa,

E labaadi concii e xalisooji e kanje buy, 23
tawa mulle juude e lambe moyye de suytataa,

E miranji moyyi e fannaa noone ko moyyi fow, 24
caagaaje buy to be nokka jeydo be andataa.

Hibe dabba tiiri e fannaa noone ko uuri fow, 25
hibe hunca balli ben jananbe be hersataa,

Hibe moora towna be sokka lince be juulataa, 26
mo be fotti woo hibe tippa senya be martataa,

Hiɓe yaade kirle e gamɗi huunde ɓe aamataa, 27
hiɓe harna worɓe jananɓe jeyɗo ɓe andataa,

Yamiroore Alla e gendiraaɓe ɓe huurataa, 28
hiɓe jumpa goopi ɓe huwwa jeeno ɓe tuubataa!

Geno kambanii ɓe o lettiray ɓe o firtataa, 29
si wonaa mo tuubi o laaɓi, fellitu wortataa

Awa jooni non jeyanooɓe jeytii leydi ndin 30
hiɓe fewja feere e hoore mayri nde feewataa.

Hari Alla muuyii jeytinay ɓe ndi wortataa, 31
kono non sabaabe le riwwataake o fandataa.

Hiɓe diida cuudi e ɗen kuɓeeje ɗe lannataa, 32
hiɓe ɣamude yimɓe ko yetta dolle ɗe dillataa.

E yamireede itto sagalle hoyre nde hattataa, 33
hoynee e tawnde ɓe jey ko hersa ka lannataa

Hiɓe hoyna tedduɓe ɓanta jayɓe ɓe teddataa; 34
e si lamɓe diwnii laamateeri mi haalataa!

Hiɓe ɣamude gerto e bofo ɗun kadi luttataa! 35
fannaa ko woodi e Fuuta huunde ɓe accataa.

E remugol ɗatal bila candi yetta ko waawataa, 36
rema irta tunte e julle huunde ɓe accataa

Deemuuru wooturu tun aray hindu sogga buy, 37
yo ɓe yettu dolle ɗe eɓɓataake ɓe waawataa

No e takko maggal paatawol, ko ndi jokki woo 38
ko yamiroore geddi Alla ndi derfataa !

Nde ɓe yetti woo hindi jokki, gootun luttataa! 39
mo ndi hewti woo hindi tappa, huunde ndi aamataa!

Hi ndi selli ken, hindi haari tew, koya waawataa! 40
tawa wakkataako ko kankiran, tawa toowataa

Iwu bimbi haa e mutal ko yaadu ndu jayataa; 41
ga be hewti woo be sokii e suudu, be yaltataa.

Hiɓe immanii ka'a diina Alla be gaynataa! 42
Geno reeninii kan yimɓe makko, be gaynataa

Heññu men e lorra jiyaaɓe Maa, yo Mo maayataa 43
Jon leyde, Jon kammuuli towɗi di joltataa

Koni dandu Fuuta masiibo be'e, yo Mo nawyataa! 44
Jon arsi, Jon kursiyyu, Wawɗo mo faljataa

Koni dandu Fuuta masiibo be'e, yo Mo maayataa 45
Jon lewru, Jon nge'e naange, Wawɗo Mo ronkataa

Koni dandu Fuuta masiibo be'e, yo Mo hiddataa ! 46